



ФИЛИМОНДИЗ КАГЪАЗ

Му кагъаз Павелихъди Гирами Рюгъну Римдиъ дибикІнайиб ву. Филимон Колосс шагъриъ Исайихъ хъугърударикан сар вуйи. Филимондин Онисим кІуру сар лукІ Рим шагъриз гьергъну гъуш-нийи. Гъаму шагъриъ гъабхъи саб гъядисайи лукІран вари уьмур дигиш гъапІнийи: думу Павелихъди таниш гъахънийи. Павеликан Онисимдиз уч уьрхру Исайин гъякънаан гъеебхънийи ва Дугъан терефкар гъахънийи. Гьергъну кІури лап пис жаза гъадабтІбазра дилигди, гъаму гъядисайиинди уч гьергъну гъафи эй-сийин хликкна къяляхъ душну, ккунивалин думу гъавриъ ахъру. Павели Филимондиз, чан лукІрахъна гъюдал йихъ кІури, тІлалапІури, бикІуру, фицики, Филимон чавси, думура Аллагъдихъ хъугърур гъахънийи. Гъеле Павел лукІгъвализ ачухъди къаршу удучІвурадаршра, Гирами Рюгъну Онисимдинна Филимондин ара-ийъ цІийи аьлакъийир ирчбакан бикІура: «Мумкин ву, саб вахт-наз думу увухъди дархъуб, хъасин гъаргандиз увухъди хъиди, амма лукІси ваъ, хъа лукІтІан гизаф заина вуйи ккуни гъардашси, иллагъки, узуз ккуни. Думу увузра гъам инсанси, гъамса-на Агъайшлантина вуйи гъардашси багъа шулу!» (15, 16).

1 ¹Иса Месигъдихъ хъугъру кІури дустагъ дапІнайи Павелихъан-на гъардаш Тимофейихъан – ухъухъди гъуллугънаъ айи, ккуни вуйи Филимондиз ²ва яв хулаъ уч шулайи вари хъугърудариз, ккуни чи Апфияйиз ва ухъухъди гъуллугънаъ айи Архипдиз.

³Ихъ Адаш Аллагъдихъан ва Агъа Иса Месигъдихъан уж'вал ва мясляаьт ибшричвуз.



Павели саб ляхин тІалаб апІура

⁴Йиз ккарагбарий уву кІваин апІури, увхъан Аллагъдиз гъам-мишан чухсагъул кІураза, ⁵гъаз гъапиш, узуз Агъа Исайихъна ва вари гирами халкъдихъна вуйи яв хъугъуваликан ва масанваликан ебхъури шулзуз. ⁶Учухъди пай апІурайи яв хъугъували, Месигъдихъди учуз айи вари ужубдин увура гъаври ахъбан бадали ккарагураза.

⁷Яв масанвали узу гизаф шад гъапІну ва ккаарцну, гъаз гъапиш, уву, гъардаш, Аллагъдин халкъдин юкІвар архаин гъапІунва.

⁸Ва гъаддиз, узхъан, Месигъдин вакилихъан, увуз яв буржйир тамам апІин кІури, саб нач-гучІ адарди пуз шулушра, ⁹узу увухъна, тІалаб апІури илтІикІуб хъана ужу ву кІури, гъисаб апІураза, фицики узуз уву масанди вузуз. Узу, Павели, Месигъ Исайи гъаънайири ва Гъадгъулантина дустагъ дапІнайири, ¹⁰узуз гъаму дустагъдиъ байси гъахъи йиз бай Онисимдихъан тІалаб апІура-завукан. ¹¹Саб фила-вуш думу узуз гъич саб ляхнизра хай вуйир дайи, хъа гъамус думу гъам увузра, ва гъам увузра хайирлу кас ву. ¹²Думу узу увухъна къяляхъ хътаураза, амма думу узкан ктабтІу йиз пайси вузуз! ¹³Думу гъамушваъ, дустагъдиъ узу Ужувлан хабарнан кІуллан итнайишваъ, яв ерина узуз кюмек апІбан бадали, узухъди гъитуз ккундийзуз. ¹⁴Яв разивал дарди, дици апІуз ккун гъабхъундарзуз. Гъит яв ужувлан ляхин яв хушниинди вуйиб ибшри, хъа гуж апІбиинди ваъ. ¹⁵Мумкин ву, саб вахтназ думу увухъди дархъуб, хъасин гъаргандиз увухъди хъиди, ¹⁶амма лукІси ваъ, хъа, лукІтІан гизаф заина вуйи ккуни гъардашси, иллагъки, узуз ккуни. Думу увузра гъам инсанси, гъамсана Агъа-йилантина вуйи гъардашси багъа шулу!

¹⁷Гъаддиз, ухъу саб ляхин апІурайиган, увухъна гъафи узу къабул апІруси, думура къабул апІин. ¹⁸Хъа эгер, думу яв улихъ тахсиркар вуш, ясана думу увуз фу-вуш буржлуди гъузнаш, думу бурж узук кайи гъисаб апІин. ¹⁹Магъа узу увуз йиз хилариинди бикІураза: «Узу, Павели, яв зарар ккебкуб кІул'ин гъадабгъураза». Гъеле узу, уву узуз буржлу вуйибдикан гафкъан кІурира адарза. Уву яв ув'инди йиз улихъ буржлу вува! ²⁰Ав, гъардаш, Агъа бадали гъамус узуз увканра хайир дубхъну ккундузуз. Месигъдиланмина уву йиз гъардаш вуйивализ дилигну, йиз юкІв сикин апІин.



ФИЛИМОНДИЗ 1

²¹Уву узухъ хъпехъур кІури, миж кади, увуз бикІураза. Уву йиз тІалаб узу ккун апІурайибтІан артухъра кади, тамам апІруб аьгъязуз. ²²Мидихъди сабси, узуз хялижвувазси, саб халра гъязур апІуб ккун апІураза. Ичв ккарагбарин кюмекниинди Аллагъди узу гъаму багарихъди учвухъна гъаърубдик умуд кайиз.

²³Увуз саламар хътаура узухъди дустагъдиъ айи йиз юлдаш Эпафрасди, думура Месигъ Исайин кІуллантина дустагъдиъ айир ву. ²⁴Гъацира саламар хътаура узухъди гьуллугънаъ айи Маркди, Аристархди, Демасди ва Лукайи. ²⁵Агъа Иса Месигъдин уж'вал гъарган ичв рюгънахъди ибшри!